

松

風

閣

詩

鈔

序

詠莪侍郎與先小穀兄同官內閣時余獲交焉得見其所刊詩初稿其續刊則已在余南還後庚戌詠莪自閩視學還京過揚始贈以全稿讀之余謝以書詠莪遂以余爲能知來乞序然則余固知詠莪詩者卽前書意申述之可乎詠莪初擬古而有神仙樂府二十篇古詩十九首非擬爲古也有出世之想故假以託於仙事有入世之感故借以發其古懷亦曰寄興述情於茲始焉耳旣而取之陶韋以潔其體參之太白以逸其氣兼之杜韓白蘇諸家以博大其情則務欲其盡變也若夫縱心

而言隨物而應付有天得之機有自在游行之趣其理
質而真其氣靜而細其思清窈而曲達其語和近而溫
醇真故不浮細故不亂曲達故不澀溫醇故不激乃詠
我詩也於諸家不執一焉人之求詠我者亦皆可得之
而余則以詠我亦似東坡耳夫詠我能盡諸家之變而
獨東坡未變去者何也詩必有我也諸家皆非我故詠
我盡變去之至於東坡則變盡而我見詠我固不能亦
變去其我也然而詠我自成矣詠我亦終不似東坡也
東坡之似少陵終不似少陵有東坡在也詠我之似東
坡亦終不似東坡有詠我在也皆自成也變則自成矣

自成則不變矣

咸豐壬子仲夏錢唐愚弟吳清鵬序

序

余與詠莪交十年矣方在韶州獲攬丰采鴻鸞鵠舉慕
尚不置歲紀甲戌挾策鹿城過辱暱就邀同借榻風雪
打窗修夜不寐出覽著饌互相夸詫遂吐肝膽言誓肺
附旣旋里閑益事欸洽謁余先人執贄門下受經問字
涼燠罔勑兩家老屋距不數武煙晨月夕持裳往來抵
掌軒眉奕馳雲上年少氣盛磅礴上下先人命題輒課
同賦每一屬稟競先攜質墨瀋猶濕誦聲間作一篇剡
腎五字衝口流連激賞動廢餐寢當斯時也嗟乎樂哉
年運而往苑枯異致鯁愚累困萊屨勘歡丁丑之冬摧

失乾蔭熒熒雞骨奄息苦經惟君摯誼溫如藹如遣車
贈舟傾褚輟馬經紀始終實賴無闕銘心泣血罔知所
報逾年秋試君擢乙科康莊驪騄謂宜厯塊再上春明
願猶頓轡舟輒所及益昌其詩清淮濁河南陞北際山
縣川直霜辛露酸人事離合風物遷貿抒情奮藻霄崢
煙軋錫然一變以泊於成屬當寫定謬責元晏雖慚蕪
言敢辭秕導蒙謂此事首原性情風騷正變一愜倫理
自非然者排比修襍拔本塞源詒癡而已君生鼎門穉
齒孤露慙楸泣硯溺苦於學字以表德可知純孝間關
壯歲操危慮深出交師友敦懇獨至間左英彥鵲起鷺

振文壇詩幟競角浮譽君獨退然貌若粥粥局門下帷
湛思博涉枕藉百籍盧牟羣言說經經經尤邃易傳爻
辰卦氣勃率理窟荆關水石斯邕隸篆箸書一子餘技
十人詩不苟作力崇體要婉篤諄復蕩掃凡豔譬如施
嬌不炫粉黛亂頭麤服天然絕世又如儒將不尙膂力
輕裘緩帶責育退舍東莞有言義極辭匠斯之謂與抑
有進者隴西甲族江東峻望侍講尙書龍驤于前尺木
秋士豹炳于後以君鴻材蜚聲踵武蟬蛻滓濁鳳鳴歸
昌雍容雅頌裨補風化燕許嗣軌颺臚紹芬一昔相期
庶幾在是來程無涯詩云乎哉余自失怙悼心怫慮流

浪江海蜃局樞牖鍛鶴不舞寒蟲自呻泚筆首簡拊膺
滋愧回盼景光纍歛而已

道光元年歲次辛巳人日同邑王嘉祿拜撰

序

長洲彭氏興於前明至我

朝而儒術大顯恭讀

四庫全書提要云彭定求之學出於湯斌斌之學出於
孫奇逢奇逢之學出於鹿善繼蓋理學宏儒心傳相接
世所稱南昀先生者也自是而後代有賢哲芝庭尺木
兩先生尤爲後學埒昀越五世而相國文敬公出焉公
承儒宗一脈之延篤守家學道德之華發爲經濟入綸
扉參機務事實登

國史不待以文辭傳而文辭自足垂後世今讀公集而

後知公之醞釀深也公少受業於同邑楞伽山人工駢
儷文古茂淵懿駕六朝而止之其爲詩也雍容掄揚則
燕許之正軌也沖和夷憺則王孟之高致也晚歲中原
多事蒿目時艱憂思慨忼激爲吟詠則又少陵忠君愛
國之忱也不作佻張黿喚之音不蹈餽飣矜炫之習優
游乎入淵雅之室而得其真傳焉乾嘉以來經師輩出
專精漢學詆譏宋儒公則生平學行以朱子爲宗集中
間有駁難無害爲紫陽靜臣其視學福建也修復考亭
書院建立文公墓堂尤服膺於安溪李文貞公學養深
邃故發爲文章和平中正弗事縉幽鑿險而義理暢達

蘊蓄宏深辨論時事揣摩縣斷動中窺要粹然皆儒者
之言精於易學理數兼爲發明旁及篆隸碑版靡不研
究凡爲松風閣詩鈔二十六卷歸樸龕叢稿十二卷續
稿四卷老學菴讀書記四卷制藝及年譜附焉先已刊
行數種哲嗣輩續有所輯裒成全集屬序於余余與公
同舉進士同立朝垂三十年交公久諗悉其先世嘉言
懿行爰不辭爲之序以著公之學問文章淵源有自云
同治戊辰冬十二月

賜進士出身

誥授光祿大夫 經筵講官戶部尙書加一級 武英

殿總裁署翰林院掌院學士年愚弟羅惇衍拜序

序

詠莪先生生平好爲詩嘗自訂其稿起甲戌至丁巳其詩和平中正專寫性情不求工而自成家數曩與先生同直樞筵又同寓金鰲玉螭橋西退食之暇時承教益比鶴因病致仕移居城南先生時復過從仍以篇什相示寓亦間有和作得以挂名集中今先生已作古人追念疇昔不勝感愴適哲嗣苻亭通政編次戊午以後詩將謀付梓因以全集見示寓讀至辛酉壬戌歲諸作見先生遭遇時艱覽物興懷每多感慨而憂國憂民之心雖在引疾賦閒時未嘗少置寓嘗贈先生詩有論事

不阿存心獨厚之語蓋當其時密勿共事固確有所見
非徒託諸空言也讀是集者庶可考先生之用心焉

同治三年十月年侍生邢鶴藻序

松風閣詩鈔

長洲 彭蘊章詠荻

卷一 澗東集 古今體詩九十九首

種竹吟

甲戌

種竹種竹逸於種穀穀遲竹速

解一

種竹種竹賢於種木

竹直木曲

解二

詠懷四首

皓月臨太空纖塵本無著靈頑雖云異天賦總不薄胡
持晶白身去善而就惡浮生有涯水徇物無底橐守身
固難言靜觀得大略但於世所趨嗜之宜淡泊

廉恥旣下衰衣食乃民防飢寒迫其後鞭扑徒胥戕所以古循吏足民務耕桑外戶而不閉安用藩與牆達哉蒙莊言局鑄禦探囊强者負之趨適以齎盜糧胡爲狂末俗論治躋申商譬如本先撥枝葉安附將民風日頽敝止沸無揚湯清波一舉手涸轍成濠梁

菟絲中道合蘭芽末路分終身久綢繆莫若弟與昆終身雖云久昏宦漸離羣時乎不再得攜手及今辰不見瓊雷隔日夜勞心魂白頭戀官職亦傷手足恩鴻鵠志四海脊令鳴共原願閉蓬蒿徑同飽疏糲餐

言登寒山麓坐看寒山泉涓涓不盈勺其下乃成淵持

滿始充量慎微當塞源一朝下山去何日復還山

將進酒

如陵之肉不入飽人腹如澠之酒不下醉人口人生萬
事不知足富貴於人竟何有將進酒春鶯醉巢絮辭柳
桃花亂落君知否勸君一杯常在手丈夫行樂貴少年
安用白頭金印懸如斗將進酒不須愁歌幽蘭彈箏篴
滿堂美人爲君醉對君起舞君千秋將進酒樂陶陶典
鸛裘貫寶刀麒麟之脯不足爲君美珊瑚之樹不足爲
君豪但須一飲醉千日世上餘物如鴻毛鸛鵲杓溫鸚
鵡熱燭花墮淚東方高東方高朝露多雙丸出沒迅擲

梭春江一日變春酒地下劉伶空奈何

擬唐人五律十二首

蘇許公應制

仙嶺鬱嵒崑飛旗上九霄雙流橫地軸萬丈轉霞標佳
氣迎龍袞春聲入鳳簫乘乾方在德岡阜聽毗謠

王待詔野望

登高望天末薄暮意如何日色隱寒樹山陰涵夕波雲
隨眠幘起風帶斷鴻過遠念采薇客遲迴發浩歌

王朝散送友

山中人一去春色滿天涯碧草幾時路白雲何處家年

華逝流水旅思逐飛花不斷征鴻影誰憐音信賒

楊盈川從軍

謀騎入回中貂蟬出總戎令嚴秋雁斷敵破陣雲空拂
劍霜華白彎弓月暈紅羽書方奏捷論爵賞邊功

陳拾遺晚次

悠悠驅馬路獨客怨長征壯懷春草盡歸思暮雲生煙
火迷新市山川繞故城如何念鄉國中夜聽猿聲

張中令望月

煙色暝高秋秋風滿畫樓關山今夜月碓杵幾家愁捲
幔燈逾暗鳴琴水欲流城南思婦夢飛落大刀頭

李供奉北樓

樓高山盡入坐對敬亭雲四望皆秋色蒼茫積翠分殘
虹收雨氣遙夕煥星文遠念斯人逝長歌思不羣

劉長卿秋眺

夕陽冷蕭寺秋雨弔荒臺落葉千巖淨長空一雁哀江
平帆影直閣靜磬聲回欲問南朝事浮雲自去來

韋左司草堂

背山結茅屋地僻謝塵喧柳下嵇康竈桐間庾信園危
檐枯樹閣亂石野泉吞竟日無人到惟聞鹿打門

杜工部悲秋

秋氣蒼然至飄零劍外身鄉關猶夢寐風雨總酸辛物
候逢搖落悲歌泣鬼神淒涼數聲雁天地汝爲賓

白尙書宴散

燭房除夜宴月沼俯秋河紅袖停歌倦青衫浥酒多薰
風歸岸柳涼露響池荷抽簾難成寐園林聞雁過

李書記曉起

夢醒啼鶯歇春陰壓畫簾柳疏殘月桂花重曉寒添金
鴨歡綃帳紅鴛貼錦匳綺窗人獨坐蓮漏數銅籤

詠史六首

鵑啼博物靜中參十葉存亡事不堪開國重權移外戚

中興碩輔誤清談銅駝荆棘先時恨石馬歌謠繼世慙
太息戎華征戰日三公折臂大江南

牙旗西指定三秦九錫文章竟卽真從此江山成逆旅
豈因社稷少功臣頭羊引駕諸宮晚尾燕巢林上國春
獨有編年陶靖節桑麻惆悵武陵人

領軍東府起戎行第一勳名玉殿旁果有孝經垂大政
豈應嚴辟按諸王永明事去憐昭業拓跋軍來笑霍光
愁煞華堂名閥武牙旗影裏見垂楊

拜命襄陽忽倒戈隱侯斷舌夢如何開基政亦尊儒術
臨難身還捨曼陀不見烽煙收北地空餘詞賦似東阿

千秋圖籍焚除盡法藏龍華竟不磨

仗義雄圖一旅收末年嗣統只風流六宮醉倒題清樂
三閣春深照夜遊貢卻青牛懷有道兵來朱雀悔無愁
秋風忽湧臨平水爲送降帆出石頭

寡恩共說開皇世大業空聞法駕勞漠北旃裘趨殿闕
江南錦繡被林皋龍因水戲開鱗甲鶴畏官征獻羽毛
四十離宮何處所雷塘秋柳晚蕭騷

蒲生我池中 乙亥

蒲生我池中其葉何萋萋臨風嫋嫋蒨不知秋色衰上
山種黃蘗黃蘗多苦心采蘗染練絲練絲變黃金無衰

而飲酒雖煖不能久無媒而踰牆雖愛不能長莫以稜
苓貴棄捐蕭與艾莫以賢豪親棄捐姬與姻危流無失
權坦衢有覆輈思患乃預防處順少自謀蒼蠅何薨薨
白璧何斌斌君心如明月不見徒自憐

田家四時

和風渙池冰農事歲云易休力感經時荒穢忽云積磽
礧曳平疇鋤犁出南陌我畦宜晚豆我隴宜蕎麥區區
肥瘠間殷勤費擘畫晴日蒸晚暄輕雷南山側造化方
綢繆草木爭甲宅四體不勤動愧茲時雨澤

時秧須下隲灌水省人工我田河之側黃梅插青蔥區

分過旬日稂莠茁茸茸努力耘稂莠匍匐田水中蚯蚓
齧我跗田水流殷紅豈不惜勞苦家世本爲農

火雲猶未收纖絳待霖雨屈指十日晴看歷過處暑青
青隴上禾炎熇或熇汝草棚蔽水車轆轤日當午水車
一日停我禾色如土富農叱犢勞貧農胝足苦往往傾
家出役及穉兒女慚余食粟人搖扇清涼所

簞車上西疇西疇刈稻時閉門春石臼當風揚竹箕相
將輸稅去多寡卻不知何用識多寡父母不我欺我田
亦云少猶瞻來歲糜豈惟三冬日可以無寒飢

虎邱

太原公子此家山
伯仲風流去不還
上界雲煙歸佛土
下方花鳥付人間
劍池尺水騰虹氣
磐石千秋蝕蘚斑
盡道銀塘風日好
百枝柔櫓幾時閒

詠古四首

年少才名動洛都
上書痛哭策籌紆
欲醫大瘡安天下
不忘中行在絕區
宣室獨言神鬼事
漢廷方切治安圖
美人香草存忠愛
爲弔湘江屈大夫

石渠明詔策賢良
東魯遺書急表彰
一自春秋開絕業
徧令郡國誦先王
匡時才略懷伊呂
經術文章壓馬楊
零落膠西稱病後
大儒終不愧行藏

少遊梁苑識鄒枚病臥臨邛失意回千古琴心成累德
一朝懷鼻溷奇才宣恩曾憶馳書去諫獵終聞抗疏來
遺篋尙留封禪稿茂陵知遇亦堪哀

三朝散秩盛文章卻埽岷峨書一牀奇字蒼茫追韻史
元經輿衍到義皇長楊別館秋時賦叢桂南山歲晚香
可惜露才投閣日漫將符命美新王

夏日流水禪居

板橋流水野池寬楊柳陰陰六月寒欲買一船來放鴨
怕人疑把釣魚竿

況公祠

丙子

吳趨古名都物力號昌阜繁華中人心蓋藏實無有嗟
哉勝國時履畝稅八九莒華願無生彫敝難爲久况公
古循吏乘傳此邦守推心安善良執法除稂莠黠吏憚
神明愚民愛慈母善政難具陳減租眾善首前者金公
綱抗疏檻車走公不避斧鉞請命顙乃后精誠感穹蒼
損上恩膏厚永樂一石糧宣德徵七斗巡撫周文襄擘
畫承公後從此三吳農再熟餘棲畝公去人攀留公沒
祠不朽盛德施於民民不忍公貧迢迢四百年獨立誰
與友

長相思

長相思久離別春鶯絲蠻思儔匹急機轉愁心結鳳城
柳含煙龍塞春飛雪不成織錦書坐看珊瑚玦

述祖德詩

顏公著廟碑陸機記祠堂卓彼古賢哲祖德同宣揚念
我彭鏗胄上世家臨江元季邁百六海寓紛欃槍我祖
躬奮臂團兵崇學鄉堅壁觀秦楚投戈全梓桑粵在洪
武初遷徙來南邦尺籍隸兵衛轉餉苦輸將三傳至朴
公陰德門閭昌藏書齊鄴侯折券師孟嘗南窗服儒素
西枝揚令芳實始成進士保障出荆湘一言忤權貴解
組詠滄浪英英梧山公繼志自南窗不及挂朝籍一辟

孝廉郎蔚菴光述作翰墨妙鍾王空懷經世略通籍未
登場明經實耆彥皓首窮青緇痛哭周忠介緹騎失披
猖我

朝布闔澤發使減吳糧公膺當路聘壁畫改絃張一菴
本廣文擢第令南疆讒嫉爭羅織枳棘愁鳳凰南陌急
親難徒步入炎荒相持獄中哭至孝感蒼蒼網羅已云
脫鶴和喜常羊

彤廷方選士三策冠賢良修身從格致抱道慎行藏沒
而祭於社俎豆依宮牆守先鄉飲賓積善流餘慶築室
聞鄰愁命匠斷棟梁至今仰遺構高蓋還相妨篤生大

司馬芝草呈奇祥方寸含太古風猷迪前光巍科繩祖
武盛德啟後行或登循吏傳或擅史才長或辭榮樂道
渺懷琴點狂我祖秉孝弟蔚然內行臧迎賓長倒屣拯
急輒傾囊貽謀及諸父閎達皆巖廊我父躬苦行不獨
工文章子高不履影原憲安糟糠時命嗟不遂春陽隕
秋霜小子竟無造潛德懼弗彰鯁鯁懷繼述惻惻結衷
腸緬維五百祀世澤亦孔長忠厚爲藩籬樸素爲隄防
詩書爲文繡禮義爲膏粱流聲馥蘭芷植品重珪璋窮
達各自立盛衰何足傷我歌述祖德祖德今未央願言
後世人志之永勿忘

龍潭舟次和王井叔

嘉祿韻

疏樹漏寒日野花明碧溪背溪有漁屋飯熟鳴村雞
敲橋斷行迹知是隱者棲殘雲暝將夕微爽西山西歸鳥
投古塔倦牛臥荒蹊揚舲發清謳吹袂風淒淒菰蘆滿
江岸月上秋蟲啼

明孝陵

松柏園林鎖寂寥遊人下馬說前朝江山未失蟠龍勢
骨肉先悲逐燕謠古殿香燈光黯黯荒原禾黍影蕭蕭
宸章今日豐碑煥屋社千秋祀典昭

秦淮水榭聞琵琶聲

金韋續續誰家子隔岸樓臺一水遙飛盡楊花春店酒
載來桃葉暮江湖青衫涕淚尊前落金縷歌詞指上調
夜半月明燈火歇更聞人語教吹簫

秣陵懷古四首

小隊紅妝出漢官武皇遊獵上林東會須逐鹿中原去
射雉親彎玉靶弓

第六神絃樂府題蔣侯三妹住青溪繁霜唱罷篴篥冷
白水中橋烏夜啼

玉樹雙沈金井梧渡江桃葉任蠻奴長繩一束韓擒虎
叔寶心肝自此無

歇絕風流歌舞場南朝祠墓劇荒涼
美人名士俱黃土
寒食飛花石子岡

龍潭柳

并序

戊辰省試同遊汪少山

貽德

曾繪龍潭柳圖距

今八載余又三過其地而少山下世已七年矣

追想曩蹤愴焉賦此

龍潭柳貌汝丰姿昔吾友秋雨秋風十載經幾回攀折
離人手依舊蟬聲帶夕陽差差倒影橫江口獨留青眼
盼故人故人別來無恙否水天一碧無前後下有蘆花
悲白首纏絲猶似畫中情歎息人生不如柳

秋窗詠物四首

秋蟬

斷續寒蟬韻，秋心入緩歌。
曉風楊柳岸，墜露木蘭柯。
薄蜨經霜健，高林得暖多。
有人調玉軫，聽此意如何。

秋蜨

栩栩到今忙，飛飛著翅黃。
不知芳草暮，猶戀晚風香。
零粉辭殘夢，孤花墮夜涼。
小山秋士在，招隱共徬徨。

秋蟲

素節鳴商籟，蟲吟得氣先。
空牀殘夜月，古砌冷秋煙。
絕調哀蟬外，清愁落葉前。
一燈人歎息，蕭瑟感流年。

秋雁

陣陣賓秋雁哀音聽不分夜寒隨夢到人定背燈聞影
斷江南月書留塞北雲孤懷誰與訴有客感離羣

十月望夕追懷程小棠

家穎

昨歲征帆重此遊故人今夕話綢繆誰知世事榮朝槿
頓覺歡蹤幻水漚歸櫂荒山何處驛孤燈寒雨舊時樓
陽關笛裏魂飛去灑淚西風弔古邱

江守愚舅氏自甘肅遊幕歸里

西風吹度雁聲哀獨客新從朔塞回入幕曾遊張掖郡
思鄉還眺李陵臺關前曉月催笳動隴上秋雲拂馬來

卻憶年年霜雪夜邊愁飛落掌中杯

戲爲井叔寫小澗波漁莊圖因題

石湖湖上楞伽山三間茅屋藤蘿纏安排漁具習漁隱
紅塵不到蒼松關胸中邱壑君自有無意得之假我手
十里平湖靜不波春光綠到門前柳短短蘆芽出水肥
弄船人去掩柴扉幾行白鷺飛晴雪一缺青山銜落暉
不知此境何從得境曠不須多著墨圖成頃刻報君知
尺幅生綃愁疥壁

春日花山

丁丑

啼鳥不知處春山雲幾重亂泉流曲澗清磬下高峰壓

屋千竿竹當門十里松摩挲古題壁多半紫苔封

支硎吾與菴題壁

先人契方外寒石託知音香積遲余到禪房空素琴寒石與菴住僧也與先君子相契今已化去山花春自媚風樹夜還吟洗鉢清齋罷鐘聲度遠林

題畫

一點離愁三疊琴淡煙疏雨寫秋心東君爲惜當門刈
吹向空山草色深蘭

斷腸幽怨有誰同露冷瑤階語暗蟲玉簫花寒秋夢醒

自翻翠袖拭啼紅

秋海棠

鉏雲園八詠

漱玉亭

黝黝池上亭池水漱寒玉人來雨乍過一鏡春波綠

延綠軒

插苗在南園苗綠入我軒當軒無雜木榆莢隨風翻

涵青閣

青山如列屏繚繞池西閣蝶引暖風香菜花黃出郭

待月坡

磐石可橫琴松風豁煙霧銀蟾生夜涼朦朧出疏樹

見山岡

入花轉層梯一岡平似掌時聞踏葉聲石徑有人上

漪漣橋

鑿池互西東石橋枕其腹園丁鼓枻來闌影隨波曲

蜨夢龕

精舍徑方丈知歸此坐禪

先叔祖尺木公自號知歸子

莊生還有夢

無夢了塵緣

放生池

荒園花木稀留此活潑機碧藻絡巉石水清魚自肥

學書四首

秦邈作隸書造端求便易後人好爲難變本而加厲作

偏始鍾王同源派差異至今揚其波矻矻疲神智直欲
奔萬端壹志成斯藝更或慕張顛狂草使豪氣博得龍
蛇驚不堪名姓記縱擅千載名何關六書義

誠懸有遺言心正筆亦正信乎觀人書可以知其性奈
何事矯揉專以斌媚勝南威與子都氣骨乏剛勁滔滔
世共趨實爲儒詬病試觀古端人其書皆瘦硬但勿乾
其中庶不類優孟

古人勵躬行戶牖皆有銘觸目自警戒非藉爲光榮不
知何年製撰句書貼楹滿漫及四壁不辨縱與橫其詞
多誇耀略無箴勸情又或錄閒文取義無由明上書伯

某甫下自署其名無當贈言意徒爾諛友朋

籀書久不諷點畫存彷彿隸法既趨便索解或多強之
本中地文三折義恂悅春秦及泰奉無別亦疑爽俗學
况沿訛面目改疇曩千古一右軍書快乃成快卓哉顏
魯公規模追既往

觀畫

人物繪維肖愚夫見共知山水無定形竟堪智者欺我
愚喜真山觀畫心不怡謂不如人物刻畫致出奇英姿
狀衰鄂媚骨摹嬌施蒼鷹怒將攫玉驄驕欲嘶當其下
筆時心與造物諮毫釐一失次神理乃盡乖觀彼畫山

水邱壑從心爲法法從蒼蒼非必潁與箕因此判難易
軒輊定不疑況稽作會始匪曰供娛嬉華蟲及藻火炳
煥十二衣神奸鑄禹鼎怪物鏤山魃下迄炎漢代五瑞
勒龜池或圖聖賢像截壁武梁祠皇初創制遠近古儀
型垂沿流及後世游戲等小兒壯哉崑崙圖十日費搆
思八駿不重駕悠悠當問誰

支硎中峰晚眺

戊寅

白雲遲遲四山起中峰窈窕白雲裏行穿密竹始知門
一杵鐘聲清入耳門外山僧導我行危樓倚空蘿壑晴
峰坳倒枯留雲氣石上飛泉帶雨聲春陰漠漠籠花竹

幾處春山聞啄木落日千巖送晚晴迴飈一陣飛寒綠
縹緲身疑住翠微短筇斜倚久忘歸須臾暮色無邊暗
但見歸鴉繞樹飛

八雕行

有序

楊鐵崖爲天台令台故多黠吏先以利餌官然
後執其短長號爲八雕鐵崖廉其奸中以法民
稱快然其黨糾結不解鐵崖卒以是免官語詳
貝瓊所撰傳中卽仿鐵崖詠史樂府意作八雕
行

天台吏號八雕羽翼盛爪距牢戲弄官長囊中鵠把握

肥瘠使擾馴囊鵝嗉飽不得呻然後顛倒黑白惟雕所欲云天台尹甘清貧發奸摘伏何其神芟夷桀黠蘇愚民嗟爾八雕昔爲雲中翮今爲入網鱗入網鱗猶能噓羶吐霧坐令天日昏吁嗟乎爲貧而仕古所聞衛中一墮非完人鐵崖能剛在無欲一官雖棄幸不污其身嗚呼一官於我如浮雲

棲霞晚次

溼翠接空煙江村暮雨天
屐聲黃葉裏帆影白鷗前
涼葛秋先到輕蕉暑未捐
匆匆驢背客輪爾泛槎仙

夜泊燕子磯

江闊天低似覆盤推蓬一碧浸闌干北山樹色窗中合
南極星文掌上看蘆荻蕭騷秋氣迴魚龍寂寞夜潮寒
十年五度秦淮月愁見槐花白露團

棲霞夜泊

柔櫓搖風趁夜闌載將詩夢度江干千巖霜氣因鐘散
八月濤聲到枕寒村柝近隨秋杵動漁燈遠帶曉星殘
扣舷三弄桓伊笛疑有潛蛟舞急湍

野步

浴水烏犍出石陂牧童橫笛向風吹飛鴉亂點斜陽外
十月江村種豆時

王惕甫先生

芑孫

逝後重過芳草堂感懷示井叔

我遊先生門忽忽三年久於學無所窺洪鐘惜小扣先
生敦古歡心賞出牝牡助我器識先浮華無足取南畝
與二林文物尊山斗子歸有餘師當在今人右堪嗟時
俗師門戶判誰某坐令卓犖姿依樣成窠臼安知末座
才必出先生後我文無定法我詩混妍醜書紳蔽一言
信心愼無苟欺世適自欺千載安能守紬繹先生言意
味一何厚悔哉提耳時藐藐聽多負及茲長別離追憶
珍瓊玖迷津浩無涯仗此辨然否日暮草堂寒悽悽暗
我友春風何時來綠此閒庭柳髮髯几杖閒光景存八

九逝者不可追往迹徒回首咄咄我何悲先生方不朽
除夕書懷

草草情懷逼歲闌流光落壑下飛湍間拋白日敲棋過
慣對青燈把卷看有雪翻添深夜暖無冰恐釀早春寒
試燈風裏行裘促且醉屠蘇一盞歡

元夕舟泊毘陵

己卯

輕帆初挂趁新晴一夕能兼兩日程水驛煙花回淑景
春街簫鼓動歡聲東風聊慰征人望圓月難爲旅客情
來日江頭沽酒處鄉音不似闔閭城

紙鳶

春風著意欲相撩，翦紙淩空度影遙。
一片晴雲裁錦繡，九天儀鳳奏簫韶。
漫收羽翼棲珠樹，好引絲綸上碧霄。
微雨不須愁溼翅，預知暖氣日邊饒。

上巳口占

千門桃李競良辰，旖旎風光嬌上春。
文杏高棲雙燕穩，綠楊低嚮一鶯新。
青驄陌上尋芳草，繡袷河邊祀解神。
無力最憐花際蝶，隨風吹傍七香輪。

移榻疑堃山房

叔父儀部
葦間公寓

兩行藤格任敲斜，隨意好風吹著花。
此是江南晚春色，慣看點綴野人家。

看花人近海棠枝落絮風軒對弈時斜日上簾簾半捲
一雙燕子故飛遲

疊石玲瓏曲磴盤兩三吟客倚闌干

同寓胡實甫孝見廉周晴溪上舍

山岡下花零落

家中鉏雲園有疊石名見山岡

只有清陰竹數竿

客中送別不勝情

余初入都依伯父少司寇修田公居公旋赴閩臬任乃移榻於此候榜

雁影飛飛入鳳城回憶閒房春草綠風光彈指六年更

春草閒房叔父假歸所築今出山又六年矣

筆玉僧

有序

予爲天台僧筆玉後身孩時於前身事頗能了

了漸長漸忘成童後乃真如隔世耳僧名永淨

號雪綬者係筆玉舊侶爲予述前身事甚悉已
卯五月予歸自京師雪綬亦化去矣感而有作
筆玉僧六根清淨可成真何爲辛苦來紅塵紅塵富貴
世亦有爾來此處何緣因當時僧年二十七禪牀僵臥
攫沈疾隴西居士舊知僧療以葠苓餌芝朮僧言我命
不再延但感居士心茫然臨終稱偈謂儔侶不生極樂
不生天當讀居士書當耕居士田王子七夕時嚮晨居
士抱子僧後身梵音入耳輒成誦較聞經史意轉親舊
遊緇客或相訪呼名一一如其人輪迴之說果虛誕兒
童知識何由神因茲靜悟游魂理如香著花影在水僧

原非我我非僧卽我卽僧無彼此宗門一叟號雪綬能
言筆玉事終始祇今亦上北邙山不知更作誰家子百
年塵海儻相逢安得同開法眼視

夜意

鳥栖人亦眠簌簌聲如雨枇杷熟多時開櫺走松鼠

葵

衛足有良知傾心表正色幸逢堯日中亭亭自孤直

苦旱四首

桐魚叩罷石牛鞭依舊雲峰插碧天一臥荒園纔十日
蒺藜生到最低田

龍祠古井壓龍堂終古凝陰此閤藏掘石噴寒壯夫死
飛來白雨夜珠光

一漑終教抱甕勤忽驚螟螣失如雲吳都故事空聞說
象替人耕鳥替耘

瞥眼登場節候過道逢縣吏說時和田家不怨秋禾少
只怨春耕我最多

秋感四首

閉門風雨感離居劍氣難消繡澀餘砧杵送寒斜日短
江湖滿地一舟虛莊生曠達能齊物宋玉登臨且著書
放眼乾坤吾事少狂歌聲已出蓬廬

廣陵門外湧秋濤，堰築浮山出堞高。
深夜鼃鼃移窟宅，清秋鴻雁滿蓬蒿。
雲蒸海國空鹽井，浪急江村散米舸。
屬邑流亡憂不淺，妍歌還聽鬱輪袍。

鯉魚風急夜招魂，帝遣巫陽下九閭。
秋盡荔枝消雪色，歲寒古柏出霜根。
鵲絃瑟縮風經柱，鶴筆淒涼月在門。
尙有白頭兄弟在，天涯惆悵菊花尊。

荒厨麤給腐儒餐，樂府新歌來日難。
卒歲檮茶違老物，隔年桃棘失司寒。
蟬吟涼露秋衣薄，雁帶離聲客夢殘。
臣朔不愁飢欲死，幾人索米住長安。

耳疾自嘲

人間無處聽鈞天，罰作聾丞計亦便。
不怕地中鳴鼓角，空憐山下滿風泉。
疾雷破柱人危坐，夜雨滴階吾獨眠。
隔壁漫防釵釧響，當頭棒喝學逃禪。

題王井叔嗣雅堂詩集

入門意氣盡如虹，一笑相逢白雪中。
鎖院春寒搖賦筆，甲戌二月望後一日學使鍾溪陳公覆試古學雪中命呈勵志酬知詩四章試者凡五十六人余因識井叔於同列中歸而訂交焉草堂夜雨點詩筒。
言歌伐木求良友，喜識斜川似阿翁。
歲月忽驚飛鳥過，六年陳迹付東風。

受業蔣彬蔚校字

松風閣詩鈔

長洲 彭蘊章詠我

卷二 澗東集 古今體詩八十六首

立春日作

庚辰

東風一夜度芳津
魚陟冰開萬象新
七種菜挑人日市
九微燈試上元辰
尊前柏葉容拚醉
餅裏梅花待放春
聽到黃鸝啼出谷
南園步履草如茵

堯峰墓舍落成誌感

茅堂開墓北
予季手經營
屋後諸峰出
門前一澗橫
春秋來埽榻
風雨住炊羹
靈爽應依此
迢迢明發情

揚州卽景

迴塘薄暝林霏合風入蘆花鳴颯颯
踟躕不見蘆中入
一陣寒鴉過白塔
斜陽墮嶺月弦魄一星熒熒浸空碧
江頭風緊潮欲來
添纜人喧燈火夕

由沂州府至泰安車中作

沂水沿餘一短吟春風童冠古狂心
雪消凍樹回新綠
何處間關鶯出林
巾車坐臥亂山中雨髻煙鬟看不同
三日羊腸行卻曲
芒鞋幾兩破春風

風搖鈴語五更闌燈火零星夢未殘十里高岡三里澗
鞭絲聲裏馬嘶寒

山頭碧火閃星星點破芙蓉曉色青疑有神靈朝代岳
九天風露返雲駢

灤水源二首

有序

濟南府城內

行宮有池方廣數十步俯瞰瑩徹中有源泉纍如貫珠
自下而上凡百千道名珍珠泉其流爲灤水庚
辰計偕道出濟南謁程鶴樵中丞於節署公子
小槐孝廉

家頤

邀余同泛舟焉因紀以詩

濟水當伏流樂源出其所因源滙成池感沸清可俯平
量萬斛珠倒飛一潭雨龍涎水面浮蚌胎月中吐一沸
生旋渦圓花那可數有時竅石生天巧奪巖乳向晴轉
成迷入幽乃全觀異態出不窮泛舟自容與

夙昔愛觀水見流未見源不圖風塵裏獲此千潺湲此
斷彼復續橐籥誰爲根時出本至靜下流漸成喧其究
爲泡影諦觀妙道存憑欄鏡顏色淪茗清夢魂軟唐醴
泉美陋晉沂水溫自從

翠華泣千載流

聖恩

登泰山觀海日

山腰出雲山腳雨山頭蒼蒼插天宇天耶山耶遠莫知
興雲出雨無盡時但見丹梯萬仞盤蛇勢仰首層霄豁
澄霽肩輿如箕絡用韋橫行天半天風厲初經犖确漸
峻峭舉趾憑空二分蹈猿猱連臂失攀援鷹隼迴眸怯
飛掉是時陽春日當午陰崖積雪白如羽上方豈識入
雲深下界茫茫不可俯槎枒參立秦時松蒼皮漏雨蟠
虬龍磨崖刻文倚青冥不知何代金泥封千尋石壁根
出土狀如斧削勢不同蒲英蓮葉千萬態疑是五丁一
夜施神工兩峰矗似羅浮開飛流直瀉從天來浮虹橫

互下不測深潭晴日轟春雷散咽白石聲聲危最高真
似登天門鐵索援引驚神魂攝衣琳宮謁青嶽待看日
觀扶桑瞰天雞一鳴眾星散火燄燒空渤海爛宿鳥枝
頭破暝飛山精窟外追風竄誰爐天地鑄羣生指使飛
廉夜扇炭須臾金鏡騰虞淵榮光炳爍起燭天人間昏
黑夜將半笑指齊州九點煙

胡實甫

希周

登第余下第獨歸錄別

流水高山綠綺琴偶逢牙曠託知音如何譜入鈞天曲
不似人間吳會吟

君言此事亦須工未可消磨冷淡中不見畫樓新燕子

年年學語向春風

在平與戴萼峰

壽南

分途遇雨卽次書懷

京華攜手子偕行一笠飄蓬又獨征
老我陌頭芳草色伴人門外亂蛙聲
天涯聚散渾閒事歧路低徊感至情
誰道今朝行不得山頭啼鳥喚新晴

繹山碑

祖龍六刻石千載無一存繹山最後毀
摹本文寶翻結體頗嚴峻不盡肥失真
臣斯變籀法自謂萬世尊詩書既煨燼
及璽創紛繁之采巡海嶠赫然耳目觀
輶輳亂鮑臭終讖錦池言賜劍效朋比
誰知反掌間悔不牽黃

犬遊戲咸陽門趙高實同惡荀卿豈誤人師心而蔑聖
足以殺其身

秋窗卽景四首

黃蝴蝶栖紫蝴蝶莊周幻相是耶非誰能了此幻中幻

紫蝶無言黃蝶飛

紫蝴蝶
花名一

竹牀石几野人家獨坐西風聽暮鴉一雨聞庭秋草綠
蜻蜓小立馬蘭花

空廊東做足徘徊落日風簾次第開居士正披蓮社卷
僧鞦菊影上階來

繡徧苔紋石徑深閒花新種滿園林東籬消息霜中晚

秋色先看滴滴金

花名

詠雞冠花

荒園夜雨滴簷牙
染出猩紅朵朵斜
名字到君成磊落
秋容爲爾著繁華
未妨瀾迹隨凡卉
不是當頭莫放花
水榭芙蓉零落後
十分顏色照山家

冬杪雨後步南園

寒夜集微霰
暖風吹散之
蒸潤作朝暄
起著單袷衣時
和興俱適覽物生光輝
開軒面南園
散步臨荒陂
桑塍無圻土
菜圃有新荻
啄雀飛上屋
涓泉流在池
誰言隆冬節
滿目皆生機
歸問候門子
金飯熟多時

春日山居

辛巳

春光三月暮蘭若結幽棲雜果當軒落流鶯上樹唳亂
雲沈石壁急雨響山溪卻憶南園望青峰繞郭西

中峰精舍

紅塵吹不到仙境畫中看瘦石孤花媚高樓萬竹寒鐘
聲迴半嶺塔勢聳千盤宿我茅亭下聽泉到夜闌

流水禪居看桃花

止水靜涵流水活禪機偶與化機逢花開花落皆初地
客住客行何定蹤三畝池塘三畝竹六時清梵六時鐘
此間人淡如雲淡世上春濃似睡濃

山房消夏

南陸回曦似小年藤牀鎮日愛高眠
自栽松桂未成把且喜借聽鄰樹蟬

紅暎初下竹梢頭曉霧濛濛溼不收
憑仗啼烏催客起葛衣先占一分秋

池館輕陰六月寒芙蓉未蕊石榴殘
可人昨夜瀟瀟雨爲展蕉心綠上闌

檻外亭亭碧玉姿撲簾香氣靜中吹
兒童只解蓮房好纔到開時問落時

鑑影頻來瞰小池游魚噴沫碧絲絲
解衣自洗端州石

研露晨臨竹葉碑

隔水簾櫳薄暝初有人引睡更繙書搖搖燈影浸空碧
破寂一聲池躍魚

槿籬門帶夕陽開野蔓孤藤著意栽坐待閒庭消暑氣
山僮抱甕灌花來

夏夜

荒園無客到枯坐學逃禪露下夜初靜月沈人未眠澄
光半潭水涼意五更蟬天末秋風起疏櫺一葉穿

松棚十二韻

北牖三弓匿清陰只數竿涼輕因樹短暑逼爲庭寬分

得龍鱗勢撐來鶴蓋圓牽蘿半補屋折竹曲遮欄泣露
千鍼密穿花一缺安無根香氣滿有隙月光攢雨過生
濃綠霜前變渥丹黑雲當戶壓火織下檐寒謾謾濤輕
送蕭蕭秋近殘自從遷地後漸覺蔽人難薇架周圍做
蘆簾次第攤出山奚改節終作後彫看

山房十詠

古柏

三年前種樹離立未成林幸有半枝柏能留一院陰榮
枯今異勢培植昔同心

一枝枯瘁僅存一枝矣

作枕頽垣古雕訛

歲月侵

叢竹

曲櫺開雪澗北牖樹檀欒雷雨千竿出風霜六月寒鳳
笙聞夜籟龍簾薦春盤寄語攜鋤客休將惡竹看

新松

略具參天勢居然遷地良枝低無鶴到花冷有蜂忙怪
石一拳枕潛虯萬甲藏濤聲來咫尺戛戛和風篁

盆池

勺水清如此拚閒學養魚活看雨過後明到月來初落
葉浮沈幻圓萍點綴疏漫云能待涸泉脈自天儲

短籬

繁藤齊綴朵出竹爛如霞風暖香逾近花低樹不遮千
絲纏馬尾一穴放蜂衙不羨桃含笑秋來插菊葩

雪澗

鑿池頗幽險因以澗爲名積雪便成窖灌花時度飄當
階承屋霑急雨作溪聲淺水魚還樂從知濠上情

疊石

拾得龜山石庭前位置來闌花開壁壘薙草出崔巍有
窟皆穿竹無紋不繡苔年年增幻相蜂蝶莫相猜

甘蕉

手植蕉三本今年一試花垂頭如熟果放瓣尙含葩未

解抽心苦相期入夢賒綠天人聽雨寒意滿山家

花牆

修篁濃綠裏繚繞一垣斜抱月常棲蝠環廊不隔花簾
開山半現苔繡樹全遮莫惜當秋月餘輝借別家

月洞

居然一輪月飛不上青天桂影秋先到蟾輝夜對圓有
人曾斫斧無夢卜乘船欲乞姮娥藥紅塵作地仙

嚴華峰丈

壽圖

舊藏漢孝廉柳敏碑拓本仲山弟

以古喻麋易之戲作東巖丈

君平久翫世世亦翫君平對酒談諧善雜技星卜并嗜

書兼四體八分勢縱橫比聞藏古碑柳敏漢東京吾弟
聚碑版列宿羅精英吾亦從所好歲歲囊爲傾籀文先
石鼓孔蹟傳延陵嵩山啟母石焦山周鼎銘秦斯吳皇
象及唐李陽冰隸書五鳳刻八珍先太羹磨崖緇陝蜀
刻石凌滄溟紀功勒夷落留題集仙靈其餘百碑碣錯
還益十朋心鄙棗木刻杞宋不足徵率或用覆瓿安能
望貼屏網羅徧孔翠不宜遺鶴翎胡乃柳敏碑不屬我
弟兄豈伊五行宿

碑云五行星中廿八舍柳宿之精也

潛耀同恆星由來

希世物所在世必爭換得古喻麝焚香寫黃庭翫世豈
翫物翫物喪其精吾儕特好弄常受外物驚君言天地

間萬物皆飄萍不脛而能走不口而能鳴其去難可料
其來本無情銜巾感青鳥坡老何怵怵賸以蒼頡廟歸

涕占羲經

華峰丈又以所藏蒼頡廟碑贈仲山亦係舊拓勝於柳敏

題顧茂才

玩靈巖訪碑圖茂才訪得古碑不下數十種茲於靈巖得宋韓

蘄王墓碑
故作此圖

客有抗志尋巖阿斷碑殘碣供搜羅象犀珠玉聚所好
涓流萬派趨洪河野王吳門古桑梓芒屨靈巖暮雲起
金微月夜弄琴臺紅艇花朝泛香水館娃響屨久銷沈
牧笛荒原弔古心春風蕙畹游馴鹿秋雨梧園啼怪禽
童童松蓋蘄王墓寂寞寒區鎖煙霧巨檻黃龍百戰勛

銘詞白石三江路金縉社稷議和戎花石朝廷泣兩宮
墮地星光埋寶劍挂天月影挽珠弓穹碑十丈鐫功德
龜趺剝落苔花蝕留與名山數寶珍不逢好事終荆棘
鐵畫銀鈎翠墨新千秋名蹟出風塵至今駐馬山中客
共說騎驢湖上人

徐州道中

山到彭城繞翠屏車輪搏石走雷霆天低芒碭誅蛇路
人去雲龍放鶴亭萬里河源沈白壁千秋虹氣結青萍
控連淮泗咽喉地形勝東南一井陘

行曹濮間作

我來荏平南雷雨息征輶冠萃雨邑間朝暮缺齏粥去
年罹元冥下流當舊濮水萍蔽徒杠斷梗浮喬木輾駒
跳井蛙汙泥漬背腹十里不見人迷塗泣痛僕望煙得
草棚人似哀鴻宿言更雨晦明沮洳漸平陸塗泥曬日
堅圻裂如龜卜茫無軌轍尋搏石愁顛覆或止盈尺乾
其下仍滲漉驅納陷阱中不察機械伏并力掀出淖淩
兢折馬足村落忽在前揚鞭恐不速荒畦有人耕責我
行卻曲問罪牽牛蹊舉耒怒橫稍下車急致詞迴車入
林樸白茅互迷津居人理浮舫臨津一長歎問道不吾
告但言渡汝去千錢我不欲落日淹西馳傾囊喚其族

馬浮赤水注車脫宗邱輓脫輓入扁舟浮注出新浴蓼
花棲水紅柳葉覆船綠禿竹兩竿撐肥魚一罾捉頗似
江南風風塵舒額賦誕登輅我車黑夜投茅屋

曹河官舍晤徐雲客司馬章二首

鬢鑠何妨雪滿鬚酡顏雖好總清癯一官落拓貧如昨
垂老心情壯不殊已有飛仙傳藥石無勞漫士寄蓴鱸
年時桃浪添三丈截竹塞笈役萬夫

黃河一去官閒甚時上游決口白日蕭齋數漏籤引睡文書

遲晝諾避炎庭館早垂簾呼童細看茶經熟愛客無勞
酒令嚴餘事更饒山水癖丹邱圖畫理殘纖

曹河答太倉畢菊農

韞珍

次公筆陣復堂堂古製千言重柏梁
憐我相逢當失意喜君聊與佐清狂
三春好夢隨流水千里歸人話故鄉
午日天涯一尊酒江關回首莫淒涼

程鶴樵中丞

國仁

見貽蒼草賦謝

靈蓍一生一百莖沐日浴月含精英
千年獨秀姬孔宅天生神物非人爭
岱東中丞清且嚴懷方嶽嶽齊魯瞻
我獨向公乞土物緣知此物無傷廉
果然驛使西北來封題周密重緘開
安排香爐置木案假爾泰筮參三才
鰕生少習荀虞說旁羅崔鄭蒐遺缺
數家泥象理不伸

乾坤鑿度籒誰抉旁通反對久支離卦氣爻辰率詭譎
比來好讀朱子書始知啟蒙探最初先天圖位姑闕疑
卽論掛扞人人殊孔氏掛一謬居右郭氏誤掛爲歸餘
乃至再揲不復掛陰陽老少無分區或以過揲計多寡
本末倒置非吾徒紫陽說易取邵子邵子言數朱言理
理數從來會一源輔嗣忘象非古矣同符奇偶出方圓
此是揲著元妙旨櫝中一策潛龍身太極元氣含渾淪
中分信手不知數究極造化參天人我公品節爲時望
鐘鼎勳名未可量爲公揲卦得泰亨小人道消往有尙

鞠歌行

王午

九方按圖索良馬一顧騅駟空四野卻笑燕臺市骨時
枉教老死風塵下烈士常懷報主心窮途局促誰知者
終軍請纓去相如獻賦來茂陵舉異才臣朔飢勿哀一
朝被殊遇彈冠豈徘徊負薪吳中叟淪落五十年逢時
當命達五馬稽山前方其道之歌誰知翁子賢風雲有
期會貧賤安足歎

夏日都門鄉館陳綬卿孝廉

慶恩

貽晚香玉

一笑開簾破寂寥妍花入手比瓊瑤晴窗六出飛香雪
涼夜雙鬢著霧綃石几拂塵看綴綴銀瓶換水記朝朝
夢回紙帳孤燈暗瘦影嬋娟舞細腰

通州沙淩齋同年

思祖

屬題尊甫肖峰先生桐陰

讀書遺像

清風林下來綠影媚几席幽人手一編貞性介于石盤桓滌煩營高歌且岸幘蓬生仲蔚廬桂煥揚雄宅想見安節心灑落無滯迹焚香展遺客古思茫然積走昔少年時煙霞頗成癖轉徙五載間勞勞事行役欲撲五斗塵靜觀百家籍安得彈指間仙境當空闢月華苔井寒露氣虛庭白高風不可追遐矣邱園客

中秋望月感懷二首

九陌紅塵靜不飛天低河漢眾星稀西風獨客聞吹笛

涼夜孤鴻伴掩扉何事關山成繭足幾家燈火綻寒衣
遙知千里清輝共浪迹年年不憶歸

涼風獵獵暮雲開如許清光市地來寂寞還能對歌舞
登臨何處好樓臺辭秋落木貞心在泣露寒蛩絮語哀
爲爾尊前一搔首百年圓月只千回

題宋定城令趙

譚

用墓碣搨本

碣在許墅之南岡

殘碑一片紫苔深悵悵千秋弔古心南渡衣冠存想像

西京閥閱久銷沈

碣云曾祖任管當西京留司御史臺

荒榛石馬餘陳迹

老樹文禽空好音保障功名今寂寞岡前流水憶鳴琴

鐘聲

空齋獨坐一燈青
古寺鐘聲隔巷聽
萬瓦濃霜隨雁落
五更殘月照人醒
誤縈朝士終宵夢
好伴山僧幾卷經
侵曉寒風吹瑟瑟
簷前枯葉打窗櫺

除夕宣武門圓通觀作

閉門風雪裏
捲卷對孤檠
已歷關山遠
還驚歲月更
梅花縈別夢
爆竹送春聲
舊侶胥江上
懸帆計客程

芳草

癸未

芳草愁羈客
燕臺欲暮天
他鄉散朋好
歸路渺雲煙
春盡黃塵裏
愁來綠酒邊
莫開匣中鏡
坐對感流年

蘭山道中

風鐸夜淒淒牽衣候曉雞茶鐺寒宿火芒屨澣春泥月
落山全黑沙深路欲迷孤村人迹少野鳥一聲啼

刺促行

桑乾水清且沃予髮曲局不可以沐回車悲歌刺促刺
促荒途縣縣驚馬躑躅上有千仞之青山仰見高飛之
黃鵠雲漫漫兮路迢迢車逶迤於山之麓驚颿忽起而
捲地吹花落兮填空谷落花辭條不再榮人生後會誰
能卜彈綠綺兮無聲揮干將兮折鏑我田有蠶我禾不
穫我倉之雀不鳴不躍雷聲轟轟電爚爚走者龍蛇屈
者螻桑乾水纓可濯回車悲歌歌刺促

菜花

半畝春菘半畝苔
嬉春蜂蝶莫相猜
荷錢瑟縮東皇惱
先擲黃金買夏來

亂落天花做畫圖
達多禪語記模糊
要拋金粟誇秋桂
莫道東風半點無

秋夜

雲容淡如水
明月近高樓
落葉飛何已
寒砧響不收
亂螢依永夜
隻雁弔清秋
有客懷天末
銀河隔女牛

重九前夜雨

未許登高吟客狂
天教風雨作重陽
菊花開到幾時徧

竹葉漉成誰共嘗心事孤懸燈在壁年華暗蝕蘚生牆
偏逢佳節晴光少欲與西皇訴短長

秋暮書懷

春明門下度新年倦客南歸秋雁前病態百般塵鏡影
愁情一縷藥爐煙黃花欲發先儲酒白袷新寒已上棉
漫倚柴荆聽雀啄隔溪還有未耕田

贈方外鏡菴二首

昔無方外侶近有鏡菴知善學王維畫工吟賈島詩飛
筇來雁宕結屋住雞陂相望何時見紅塵日日吹

寒山留石刻丈室號銘心

所居金井菴舊號銘心菴有趙凡夫書額緇客翩

然到白雲從此深疏花明舊圃清磬度空林遙想龕燈
下低徊出苦吟

介堂誦新詩頗愜予意題贈四首

雪裏梅花徹骨寒詩人品格到應難三年不見羊裘子
膝上瑤琴古調彈

民俗歌謠入紀聞淒涼七字弔斜隲簞瓢志節真儒語

胞與關心冥漠君

介堂弔鮪夫詩云物我同胞應下淚飢寒出戶亦何心

試馬原從相馬來誤題詩句不須裁憑將三寸毛生舌

掉得平原歃血回

介堂爲人題試馬圖誤作相馬後乃爲詩以解之舌本欄翻真有逼肖古

處人

灰裏陰何詎是奇春光多在最高枝人傳花下一僧臥

未盡吾家秋士詩

介堂論詩極服吾家秋士先生先生詩有花下一僧臥階前雙蝶飛之句

膾炙人口余謂尙非集中最上乘也

救姑行 有序

汪婦吳氏夫死奉舅姑居吳郡臨頓里里中災

延及汪屋孝婦扶翁出復入火救姑遂與姑共

被焚事在嘉慶丁卯年惟時詠歌其事者甚眾

余茲仿古謠諺之詞俾里巷婦孺皆得誦其芬

烈焉

汪孝婦母家吳良人早沒無孤執篋積潔中厨婦代子

職手持据譴諱出出火入廬披衣握髮將翁扶老姑憑
牀哭嗚嗚迴身救姑入火趨入火趨婦何愚婦不愚婦
生姑死婦罪當誅力不能救死與俱天平天平嗟爾孝
婦生卒瘁死骨枯殺身成仁古丈夫東家婦亦有姑微
勞薄譴父母呼何能急難捐其軀吁嗟孝婦爲人模

雞鳴高樹顛

甲申

雞鳴高樹顛犬吠深林中天下方太平豪俠爲無功腰
間步光劍寶氣騰白虹持用報知己百年難可逢貫酒
邯鄲道趙女攜相從爲君彈箏唱寫君磊落胸驅車遊
冀北一顧凡馬空據鞍日千里年少欽英風

祈麥曲

吹龍笛擊鼉鼓靈旗翻翻風以雨桐葩萍見春暮時中
田有鼠新麥稀農壇祈麥使麥肥鵲火煌煌昏中起臺
笠東皋共舉趾陰晴問卜番風裏雨淫淫水深深禾黍
不穫愁我心種榆榆棉薄種桑桑甚枯飢烏夜啼尾畢
邁願祈岡田蕎麥實隰田小麥腴家家若持牛酒酺坐
使蒼髯黃髮鼓腹相嬉娛盎中有酒釜有魚斂幽里社
人樂胥我歌祈麥曲父老且徘徊一歌陰雲豁再歌朗
日開日開雲豁風光媚句芒夜拜天公賜蒼葉青青隴
雉飛農官上獻雙歧瑞

蠶市謠

清明晞蠶穀雨浴倉庚鳴矣柔桑綠姑婦相呼著意忙
蠶市紛紛競吳俗去年蠶盛絲價微今年絲貴桑葉稀
年年採桑今買桑頭眠典盡寒時衣誰家女兒曳長袖
鴛鴦一雙五紋繡可憐蠶婦筐中絲連朝入市沽不售
辛勤只有阿嫖知頭髮不梳春盡時欲把儂心比作繭
抽將萬縷愁腸迴菰蒲青青滿水國農家半食漁家食
昨日西鄰換米歸黑雲山頭又翻墨平明曉日東窗紅
桃漿滴滴鼓鼙鼙願祝宜蠶又宜麥晴天吹過楝花風

折楊柳

折楊柳贈遠行玉關迢迢傷客情腰間寶劍黯無色馬
上坐看愁雲生驚飆捲沙撲人面冰天回首腸應斷羽
書消息竟如何關心欲問南來雁

鰕鰕篇

鰕鰕游潢汙不堪逢小旱神龍作霖雨崇朝千里遠千
里澗枯槁默贊造物功非爲鰕鰕故受命于天公

明憲文成公畫臥龍松障子歌

虛堂晴日壁蟄雷黑雲入牖真龍窺潛潭埋壑不知幾
千歲剝落鱗甲生蒼苔何人巨手作此畫憲文成公明
代才畧言臣義奉命募於閣洪熙二年正月時洪熙海

宇昇平日一人垂拱臣簪筆因思梁棟重人材爲寫風
雲屬良弼藍水從窺內府藏殿前捧出重琳琅揮毫宛
轉參天勢潑墨淋漓帶夜光君王嗟歎稱奇絕御屏疏
璃眼生纈銀濤掀舞犯星辰玉髯橫飛散霜雪青花歷
歷磨巨鍼黑幹錚錚屈生鐵中間一節痕斑斕猶認元
黃戰時血文成畫松真似松不惟似松兼似龍滄桑迢
遞四百載故紙流落來吳中朱泥私印蠹蝕半鐫文古
樸追漢銅拂拭塵土挂高閣青燈獨夜聞天風

白木老人歌

有序

余家近南園爲宋蘇子美故里庭前古柏一枝

著有靈異久戒翦伐甲申九月以築室闢場除
其枯瘁并刪其旁叢竹數竿夜夢偉丈夫幅巾
綠衣鬚眉皓然曰余白木老人荷子美栽培之
力垂七百年近託君家七世安居月夕風晨共
君延賞六君子近勞翦伐余亦生意盡矣覺而
感寤作歌紀之

蚪枝參天黛雲碧茅堂庇蔭稱嘉植翩然入夢數生平
此地無疑子美宅子美一去七百秋老人忽忽成白頭
滄浪花石虛陳迹東海風煙入古愁我家南園始明季
飛雲傑閣傳靈閣開卷朝參河洛圖焚香夜語神仙事

鸞飛鶴降到塵寰老人不聞一叩關何因枕上南柯夢
卻爲階前惡竹剛喬枝百尺原無恙桃僵李代增惆悵
含怨含愁付夢占老人高義雲天上人世交遊漆與絃
榮枯異勢不相憐欲將白首同歸語獨向空林弔七賢
餘不溪

清溪昔隱區風景果然殊一水侵橋直諸峰抱郭迂桑
麻收早歲菱芡入輕租鼓枻者誰子煙波一釣徒

黎里鎮

一櫂煙波裏孤村抱水斜荻蘆仍野色雞犬漸人家菱
浦朝乘艇漁舟夜放叉盤飧何所薦秋雨上爬沙

雲林寺飛來峰

虎林山麓飛來峰蒼崖兀立雲林東渾沌鑿破千萬年
五丁來下施鬼工人間斧鑿不到處斲削奇狀何玲瓏
初疑峨嵋千尺壁羊腸一綫猿猱通又疑羅浮兩山合
中有雲氣騰蛟龍天生奇秀并一處移之豈必煩愚公
我來正當飛雪後入門忽失青芙蓉峰坳豁羃露棱骨
石缺歎水鳴琤琤閣黎法象何從龍騎獅伏虎貌不同
洞中兀坐幾千歲眼耳剝蝕蒼苔封料知佛心喜寂滅
屏除色相還虛空僧來邀我食蔬飯山寺日午聞清鐘
更探奇勝上天竺卻看來徑寒雲重

冬杪雨後望湖樓作

西湖一鏡寒波白搖蕩寒光照顏色青山如帶繞湖隄
倒影湖流浸空碧錢塘巨浸吞東南潮頭如山落夜潭
跳珠散雪詫奇景未若萬象空明涵我來細雨湖山曲
湖煙濛濛障寒綠忽看半壁挂斜陽螺髻青青出新沐
東坡先生去不回湖山岑寂鶯花猜丹梯重開七百載
阮芸臺制軍重建望湖樓一收嵐翠當空歸望湖樓宜春秋春秋風
月澄雙眸湧金門外北風緊柳色蕭條惹客愁

冬日登穹隆山

莫道山如睡還看積翠濃陰崖殘雪點荒徑晚煙封雲

影一潭水風聲萬壑松大羅仙侶近一杵上方鐘

受業蔣彬蔚校字